

Phah-phu-kng



母語文學專欄出世

——Phah-phu-kng專欄介紹

專欄編輯／陳慕真（國立台灣文學館 母語文學小組）

「Phah-phu-kng」：台語。
形容微微的光，漸漸要增強。
通常指天快亮、迎向黎明的意思。

| 編按

國立台灣文學館為著欲落實推展台灣母語文學、寶惜母語文化的目標，uì今年開始，備辦台語文學展、台語文學主題冊展，以及濟濟教育推展活動。另外，uì第19期開始，台灣文學館通訊攏定期報導母語文學ê相關消息，阮mā希望轉變成做一個常設性ê專欄，逐期固定8頁ê篇幅，內容以母語文學ê紹介、教育、推廣為主，專欄前後有簡介kap活動消息ê放送，所以uì第21期開始，咱有tsit ê母語文學專欄來出世。

Ti官方備辦ê刊物當中，這是頭一ê增設母語文學專欄ê刊物，通講是台灣文學界值得歡喜ê代誌。台灣ê母語文學若親像行向另外一個坎站，看會著閣khah多彩ê未來。因為按呢，阮將這個專欄號做「Phah-phu-kng」，有天tit欲光，迎向黎明ê意思，象徵tsit ê專欄tī台灣文學史上ê意義。另外，為著hōo讀者通uì專欄吸收著母語文學ê相關消息，mā特別設計「我kā你講，你mài kā別人講」ê台文走馬燈，請大家互相鬥相報。

世界逐國家ê文學攏是uì民間文學起頭，口傳ê歌詩成做作家文學ê肥底，台灣ê母語文學mā是全款。頭一期ê「Phah-phu-kng」，阮設計「聽台灣歌、吟台語詩——台語歌詩紹介」專輯，內容欲紹介台語歌詩，到底台灣歌謠kap台灣文學有啥物關係？戰後又koh有啥物台語新詩？兩篇文章tshuā大家來了解，請列位讀者tuè阮做夥來「聽台語歌、吟台語詩」。以後逐期ê「Phah-phu-kng」攏會規劃無全ê專輯主題，ng望咱saⁿ-kap tī tsia起造母語文學美麗ê花園。



我kā你講，你mài kā別人講

- ◆國立台灣文學館《台灣文學研究學報》第八期專題稿約：台灣母語文學研究（2008.12.31截稿）
- ◆台灣閩南語語言能力認證（台語檢定）：2009年6月之後舉行（考試時間以教育部公佈為主）